

蹇卦第三十九（下艮山 上坎水 — 水山蹇卦）



蹇，利西南，不利東北；利見大人，貞吉。

1. 蹇，音簡，謂足不能進，行之難也。故蹇卦象徵行事艱難之意。依後天卦位，坤在西南，艮在東北，坤象地，艮象山，故西南象徵平地，東北象徵高山。當蹇難之時，所行宜避險就夷，故利西南，不利東北。當蹇難之時，利於出現大人奮起有為，方可濟難。又當謹守正道，可獲吉祥。
2. 王弼曰：西南，地也；東北，山也。以難之平，則難解；以難之山，則道窮。
3. 孔穎達曰：西南順位，平易一方，東北險位，阻礙之所。世道多難，率物以適平易，則蹇難可解；若入於險阻，則彌加擁塞，去就之宜，理須如此。
4. 朱熹曰：當蹇之時，必見大人，然後可以濟蹇。又必守正，然後得吉。而卦之九五，剛健中正，有大人之象。自二以上五爻，皆得正位，則又貞之意也。
5. 李世鈺曰：水行山上則蹇，故不利東北，東北對西南為坤，水行地中則不蹇，故利西南。九五陽居尊位，為一卦之主，集眾力而濟大蹇，故天下利見之。二、五中正有應，故貞。不以詭詐出險，而以正大成功，吉之道也。
6. 黃壽祺曰：卦義濟蹇之道有三：(1) 應見機行事、進退合宜：所謂「利西南、不利東北」，即在觀察時機，可進則進，不可則退。(2) 應有大人領導：所謂「利見大人」，即在說明領袖人物，能聚合四方力量，團結上下意志，濟蹇方能有功。(3) 應固守正道：所謂「貞吉」，即濟蹇之言行不違正道，始獲吉祥。
7. 序卦傳：睽者，乖也，乖必有難，故受之以蹇。

彖曰：蹇，難也，險在前也，見險而能止，知矣哉。蹇，利西南，往得中也；不利東北，其道窮也。利見大人，往有功也。當位貞吉，以正邦也。蹇之時用大矣哉。

1. 彖傳曰：蹇卦象徵行事艱難之意，卦象下艮止、上坎險，因坎險在前不可進，故難也，見險難而能止步，其為智者也。當蹇困之時，利西南，以西南坤位，

而外坎體之九五爻，乃乾陽居坤中之正位，得其中道。不利東北，以東北艮位，艮止難行，路困途窮。

2. 孔穎達曰：坎卦在外是險在前也，有險在前所以為難，若冒險而行，或罹其害。艮卦在內，止而不往，相時而動，非智不能。
3. 薛溫其曰：諸卦以內為來、外為往。「蹇，利西南，往得中也。」則中在外，指九五得中；「解，其來復吉，乃得中也。」則中在內，指九二得中。蹇、解二卦互綜。
4. 蹇困之時，非聖賢智能者，不能濟天下之蹇，故利見大人也。大人當多功之位，則濟蹇之事往而有功也。又蹇卦諸爻，除初六外，皆當正位，故為謹守貞正而獲吉也。而初六陰居陽位而處下，亦陰之正也，均可以正道濟蹇而正其邦國。處蹇困之時，以此濟蹇，其功用至為弘大。
5. 劉沅曰：蹇有艱難之意，坎險在前不可進，故難也。見險難而能止為知。而濟險必以能往為功。坤位西南，致養萬物。乾陽居坤中之正位，乃得中道。東北則愈入於閉藏消歇之所，其道必窮。大人者，濟蹇之人；貞者，消蹇之道，故吉。天下之難，非聖知不能平，故曰時用大。
6. 胡炳文曰：彖傳所謂「往得中」、「往有功」、「以正邦」，即其用之大者也。

象曰：山上有水，蹇；君子以反身修德。

1. 大象傳曰：卦象下艮山、上坎水，故有山上有水之象。水積山上，則有山險水阻，有行之危難之意，故名蹇卦。
2. 孔穎達曰：山是巖險，水是阻難，水積山上，彌益危難，故曰：山上有水，蹇。陸績曰：水在山上，失流通之性，故曰蹇。
3. 君子觀察蹇卦山上有水，行事彌益危難之象，悟知處蹇困之時，當先反求諸己身，自修其德，道成德立，方能濟蹇涉難。
4. 孟子離婁篇云：「行有不得者，皆反求諸己」，是也。程頤曰：君子之遇艱阻，必反求諸己而益自修。
5. 朱子語類：澤無水，困，故止得致命遂志。若山上有水，蹇，雖曲折多難，

然猶可行，故教以反身修德。

6. 馬振彪曰：時當睽違或蹇困之時，正如孟子告子篇所言：「天將降大任於斯人也，必先苦其心志，勞其筋骨，餓其體膚」之時也。時不同則所用各異，睽卦大象傳用「以同而異」之道以合睽；而蹇卦則以「反身修德」之功以濟蹇，各有其妙用也。

初六，往蹇，來譽。

象曰：往蹇來譽，宜待也。

1. 初六處蹇之始，陰柔卑下，上無應與，故往外發展將遇坎險，而遭蹇困，若能目睹坎險而退處艮止，以待其時，見機而作，則將獲譽為智者。

◎往，指上坎，進入坎險也；來，指下艮，退處艮止也。

2. 王弼曰：初六處難之始，居止之初，獨見前識，覩險而止，以待其時，知矣哉！故往則遇險，來則得譽。
3. 劉沅曰：處難之始，居止之初，上進則入於險，不進則見幾而有譽，言其時當待而勿往也。
4. 何楷曰：此卦爻辭中言來者，皆就本爻言，謂來而止於本位也。初六去險最遠，其止最先，獨見前識，正彖傳所謂之智者也。
5. 象曰：初六往外發展將遇蹇困，退處艮止則將獲譽者，乃說明其宜待時而往，見機而作，非終止不行也。
6. 趙汝謀曰：宜待者，乃待時而往，非終止不行。

六二，王臣蹇蹇，匪躬之故。

象曰：王臣蹇蹇，終無尤也。

1. 六二柔順中正，上應九五陽剛，當蹇困之時，志在濟蹇。猶如一位盡職的王臣，奮力劬勞而不為己身，志在匡復王室。◎王臣，指六二，相對於九五君王之稱。◎蹇蹇，謂不計成敗得失的奮力濟蹇。
2. 王弼曰：六二處難之時，履當其位，居不失中，以應於五，不以五在難中，私身遠害，乃執心不回，志匡王室者也。

3. 蘇軾曰：二、五君臣之義深矣，是以不計遠近，不慮可否，無往無來，蹇蹇而已。君子不以爲不知者，匪躬之故也。
4. 象曰：六二當蹇困之時，不畏己身，不計得失，志在濟蹇者，意指其力拯陷於坎中之九五君王，二者有應，力濟其蹇，功未必就，然大義無虧，無所怨尤。
5. 朱熹曰：本爻不言吉凶者，占者當鞠躬盡力而已，至於成敗利鈍，則非所論也，事雖不濟，亦無怨尤。

九三，往蹇，來反。

象曰：往蹇來反，內喜之也。

1. 九三陽剛得正，處下艮之上，前臨坎險，故往則入險而遇蹇，惟其乃遇險而能止者也。又其下據二陰，故來則得位而歸得其所，可先安其內也。

◎反，猶言歸也。

2. 王弼曰：九三進則入險，來則得位，爲下卦之主，是內之所恃。
3. 黃壽祺曰：九三陽剛得正，坎險在前，其濟蹇之道是先退後進，先安內而後圖進，此即象傳所謂「見險而能止，知矣哉」之義。馬其昶曰：濟蹇之術亦多矣，九三之來而復反，蓋欲先安其內也。
4. 象傳曰：九三往則入險而遇蹇，來則得位而歸得其所者，乃因陰喜陽歸，內卦二陰喜九三之來歸。
5. 孔穎達曰：內卦三爻惟九三一陽，居二陰之上，是內之所恃，故云：內喜之。
6. 劉沅曰：內者，內卦之二也。陰喜從陽，故三反而內喜之。凡忠良得賢士之內助，皆象此。

六四，往蹇，來連。

象曰：往蹇來連，當位實也。

1. 六四柔順得正，下與初六無應，往則身陷於坎險之中而遭遇蹇困，因位於兩剛之間，來則可連接九三與九五，合二剛之力以濟蹇。

2. 歸有光曰：四處近君之位，三、五二陽非四其誰連之，夫連桓公、仲父之交者，鮑子也。連簡公、子產之交者，子皮也。
3. 馬振彪曰：四居三、五之中，互成離象，明照四方，可以連上下之交。
4. 劉沅曰：六四陰柔，往與上應則益柔，來則承五乘三皆剛，爲上有賢君信任，下有賢士相助之象。
5. 象傳曰：六四往則身陷於坎險之中，來則可連接九三與九五兩剛合力濟蹇者，乃說明其所以能濟蹇，乃由於其所當之位柔順得正，上倚依於賢君之信任，下得力於賢士之相助。
6. 劉沅曰：凡言實者，皆謂「倚依於...」「得力於...」之意。

九五，大蹇，朋來。

象曰：大蹇朋來，以中節也。

1. 九五獨居坎中，是處難之大者，故曰：大蹇。惟其以陽剛中正之德，居不失正，履不失中。除下應六二，其他諸爻亦皆往而相挺，故有友朋紛來，共濟蹇難之象。
2. 劉沅曰：九五陷陰中，正當險位，爲大蹇。然才德可以濟險，陽剛居尊，凡卦中比應諸爻，無不仰而賴之。匪躬之二，正應而來；來反之三，又挾二以俱來；來連之四，相比而來，其所連之三，亦承四以俱來；故曰：朋來。以本爻言之，即象傳所謂當位貞吉，以正邦也；自諸爻言之，即象傳所謂利見大人，往有功也。不惟王臣蹇蹇，凡來譽、來反、來連、來碩者，皆欲出而圖君。是諸爻以爲往者，自五視之則爲來；諸爻以爲臣者，自五視之則爲朋。
3. 胡炳文曰：諸爻皆以往爲蹇，聖人又慮天下皆不往，蹇無由出矣。二、五君臣復不往，誰當往乎？是以於二曰蹇蹇，於五曰大蹇。
4. 李光地曰：二、五獨無往來之文，蓋君臣相與濟蹇者。其責不得辭，於義無所避，猶之遯卦，諸爻皆遯，六二獨以應五，而固其不遯之志也。
5. 象傳曰：九五獨居坎中，身處大蹇之中，而卦中諸爻皆往而相挺者，乃謂其保有其陽剛中正之志節，以一中節制群才，無過與不及，濟蹇可成。
6. 馬其昶曰：諸爻同欲濟蹇，九五能以中節之，使譽、反、連、碩各當其時與位，皆爲濟蹇之大人。

上六：往蹇來碩，吉，利見大人。

象曰：往蹇來碩，志在內也，利見大人，以從貴也。

1. 上六陰居蹇卦之終，蹇極將通，往則無益而徒生蹇難，當來以下應內卦九三陽剛，剛柔相濟，同心協力，則蹇難可濟，而獲吉祥。故利於有陽剛大人之協助。 ◎碩，大也。陽謂大，此指九三陽剛。
2. 劉沅曰：上六陰柔獨往則蹇，來應內卦九三陽剛，剛柔相濟，則吉。
3. 朱熹曰：蹇卦諸爻皆不言吉，蓋未離乎蹇中也。至於上六則曰：往蹇來碩，吉。卻是蹇極而有可濟之理。
4. 象傳曰：上六陰柔獨往則蹇，故來應內卦九三陽剛者，說明其乃志在下應內卦賢士，以共濟艱難。而上六利於有陽剛大人之協助者，乃意指其應附從於尊貴之陽剛君子九五，以從王濟蹇。
5. 劉沅曰：上六下資賢士，與之從王濟蹇，故吉。貴，指九五。 梁寅曰：上六高世之士，以五在難，亦來助之。
6. 馬其昶曰：志在內，謂應三而不變也。從貴，謂比五也。上六既來，天下無復蹇矣，故獨云吉。上之來，爲從五，則諸爻之來，亦可知從五也。